

թող տերն ի ձեռանէ: 54 Կամ զիա՛րդ ամբառնայցեմ<sup>1</sup> զձեռս իմ աղաւթիւք առ Աստուած վասն այնոցիկ, որոց ձեռք իւրեանց շաղախեալ են արեամբ սրբոց Տեառն. կամ զիա՛րդ մատուցանեմք աղաւթս պաղատանս այնոցիկ՝ որք դարձուցին զթիկունս առ Տէր, եւ ոչ գերեսս իւրեանց: 55 Կամ զիա՛րդ եղեց բարեխաւս վասն այնորիկ, որք նուածեցին<sup>2</sup>. կամ զիա՛րդ խաւսիցիմ ի հաշտութիւն վասն այնոցիկ, ոյք փախուցեալն են եւ ոչ կամին դառնալ. որոց ինքնին Տէր նիւթեաց պատրաստեաց զամենայն չարիս ի վերայ լոցա վասն այսորիկ, զի ասացիք թէ ոչ տեսանէ Տէր զայս ամենայն, եւ որ ինչ նման է սոցին բանիցս:

56 Չայս բանս խաւսեցաւ սուրբ ծերունին Դանիէլ քորեպիսկոպոսն առաջի թագաւորին Տիրանայ, եւ առաջի իշխանացն, պետացն եւ ամենայն զաւրացն: 57 Եւ մինչ դեռ խաւսէր նա զայս ամենայն, հիացեալ զարմացեալ թագաւորն միտ ղնելով լուռ եւեթ կայր: 58 Եւ եղել իբրեւ զայս ամենայն լուաւ, բորբոքեալ ի բարկութիւն<sup>3</sup> դառնութեան ամբարշտութեան ցասման իւրոյ. զոր տայր հրաման անդէն խեղդամահ առնել զնա: 59 Չոր իբրեւ լուեալ անդէն սպասաւորացն, կատարեցին զգործ հրամանին վաղվաղակի. բայց մեծամեծք նախարարացն աւագանին շատ եղին ի մտի արքային, զի մի՛ կատարեսցէ զչարութիւն կամացն իւրոց. առ դառնութեան սրտին ցասման, առ զայրուցս բարկութեանն՝ ոչ ինչ անսաց լոցա. այլ ճոպան ի փողս եղեալ, խեղդամահ արարին զնա: 60 Այսպէս կատարեցաւ սուրբն Դանիէլ:

61 Եւ բարձին զմարմին նորա բազմութիւն մարդկան, որք տեղեակ էին նմա, եւ զիտէին զնա. եւ կամեցան մեծարել զնա ընդ ոսկերս սուրբ վկայիցն Զրիստոսի: 62 Ապա ինքն յայտնեալ երեւեցաւ առն սրբոյ աշակերտին իւրում, որոյ անուն կոչէր Եպիփան, զի մի՛ ի պատիւ առցեն զոսկերս նորա իբրեւ զայլոցն. այլ տարոցին ի տեղին՝ ուր ինքն<sup>4</sup> հրամայեաց, եւ ծածկեսցեն ընդ հողով: 63 Չի այսպէս յայտնեալ բարբառեցաւ լոցա. զի եթէ տերունական մարմինն, ասէ, ի գերեզմանի ծածկեցաւ աւուրս երկուս մինչեւ ցաւրն երրորդ՝ յորում յարեաւ առ հայր իւր, ո՞րչափ եւս առաւել պարտ է մերում հողեղէն մարմինս<sup>5</sup> ընդ հողով ծածկել: 64 Ապա բարձին զմարմին նորա սուրբ սիրելիք իւր աշակերտք, որոյ զխաւորին անուն էր Շաղիտա, որ ի նմանէ իսկ աշխարհին Կորդուաց վարդապետ տուեալ էր. եւ երկրորդին անուն Եպիփան, որ զաւառին Աղձնեաց եւ մեծաց Ծովիաց ի նմանէ իսկ վարդապետ

1 Մի օր. բառնայցեմ

2 Թերեւս նահանջեցին

3 Օրին. մի՛ բարկութեան. այլք՝ բռնաւորութիւն

4 Յօր. միում՝ ինքն կամեցաւ եւ հրամայեաց

5 Յօր. միում՝ մարմնոյ